

■ PLAID PER LA DUMENGIA

Spluntar e turnar a spluntar

DA SUR MARTIN BEARTH, MUSTÉR

Quella perseveranza, quei spluntar e turnar a spluntar, illustrescha Jesus cun ina semeglia, la semeglia dil malgest derschader (Lc 18, 1-8). Ina paupra vieua enquera dretg e giusta e splunta e tuorna a spluntar tier in derschader che veva «ni tema da Diu ni turpetg avon ils carstgauns». La finala vegn quei derschader unfis e procura per dretg alla vieua.

Egl evangeli stat ei scret: «Jesus ha raquintau quella semeglia a ses giuvnals (ed era a nus) per mussar ch'els duegien adina urar e buca calar. Lu vegn Dieus a ver pazienza cun els e beinspert procurar giusta ad els.» E lu aschunta Jesus ina construcziun che dat da patertgar: «Anfla il Fegl dil carstgaun cardientscha sin tiara cura ch'el vegn?»

Ei va pia per oraziun e cardientscha. Oraziun senza cardientscha ei buc oraziun. Mo era cardientscha senza oraziun ei buca cardientscha.

Sche nus prendein Diu per nies meglier amitg scapescha ei da sesez che nus discurren adina pusppei cun el. Quei discurs cun Diu ei naturalmein buc in «sburbar cun gronda patarla sco ils pagauns fan», sco Jesus di avon che mussar il Babnos a ses giuvnals (Mt 6, 5s).

Tgei vul quei dir «urar e buca calar»? Ei dat bia fuormas e pusseivladads da discuorer ed haver cuntinuau contact cun Diu: Persuls ni en cuminonza, cun plaids e cun patratgs, cun nos desideris e nossas larmas, cun admirar la scaffiziun e selegrar, cun envidar ina candeila, cun in'egliada silla crusch, cun cant e cun musica, durent la lavur ed ella recreaziun...

In um vegn tier in sabi e di: «Jeu urel mo cu jeu hai plascher.» Il sabi rispunda: «Tilas ti era flad mo cu ti has plascher? Urar ei sco il trer flad, igl ei necessari di e notg, mintga di, tutta veta.»

Dieus ha buca dau a nus in spért da tema, mobein in spért da forza, da carezia e da prudientscha» (2 Tim 1, 7). Forza e curascha, carezia e prudientscha e bia auter dat Dieus adina puspei a nus sche nus spluntein e turnein a spluntar tier el. Ed adina danovamein splunta era Dieus tier nus. «Uarda, jeu stun avon porta e spluntel. Tgi che dat ureglia a mia vusch ed arva la porta, tier quel vegn jeu ad entrar, e nus vegnin a far tschavera ensemen, el cun mei ed jeu cun el.» Aschia legin nus el davos cudisch dalla bibla (Pal 3, 20). Dieus entra leu nua ch'ins arva ad el.

Perduna a nus nos puccaus sco era nus perdunein a nos culponts

Mattiu 6,12

■ LITTERATURA RUMANTSCHA

Colloquis rumantschs a l'Universitad da Turitg

(cp) Ils colloquis rumantschs a l'Universitad da Turitg èn daventads in'istituiziun per bleras Rumantschas e blers Rumantschs en la Bassa. Er uonn preschenta *Mevina Puorger* in program da discurs variont cun duas auturas ed in autur rumantsch ch'han dacurt publicità novas ovras. Nudai las suandantas datas en voss'agenda:

29-10-2019

Colloqui Rumantsch cun *Flurina Badel*: «tinnitus tropic»
L'artista-autura da l'Engiadina preschenta «tinnitus tropic», ses debut lyric fragil, attatgant e tschaffont.

19-11-2019

Colloqui Rumantsch cun *Tina Planta-Vital* «Il blau tocca la terra».
La secund'ovra da la poetessa valladra è commovent, cun vusch ferma feminina, melodius e profund.

28-1-2020

Colloqui Rumantsch cun *Walter Roselli*: «Cuntradas imaginarias»
Descrizziuns da viadis reals e/u fictivs da l'autur tessinais avran novs orizzonts da lieus e spazis enconuschents e nunenconuschents.

Ils colloquis han lieu en il bajetg principal da l'Universitad da Turitg, Rämistrasse 71, da las 19.00-20.30. Custs 30 francs davent da las 18.45. Mintgina e mintgin è cordialmain bainvegni. Infurmaziuns ed annunzia: www.vhszh.ch



Affons dil 3. quartal dall'annada 2018

Suenter las presentaziuns dils affons dil secund quartal dall'annada 2018 vul La Quotidiana cuntinuar cun presentar ils affons dil tierz quartal 2018. Nus dein la pusseivladad agl entir intschesch romontsch da separicipar.

Tarmettei pia ina foto actuala da vies affon ch'ei naschius el fenadur, uost ni settember 2018 cun las suandantas indicaziuns:

- num e prenum digl affon
- data da naschientscha
- liug da domicil
- num e prenum ed adressa dils geniturs

La foto digitala duei esser sil pli pauc 500 KB. Fotografias da handy ein buc adattadas, bunas fotos sin pupi perencunter bein. Scapescha che lezzas vegnan returnadas.

Las fotografias e las indicaziuns ein d'inoltrar entochen ils 31 d'october 2019 alla suandonta adressa:

La Quotidiana
L'annada 2018
Via Sommerau 32
7007 Cuera

e-mail: redacziun@laquotidiana.ch

Ovra da Dumenic Andry en rumen

■ (anr/gc) L'Ambassada svizra a Bucarest – ensemen cun l'Uniun svizra en Rumenia – envidan a la preschentaiziun da «Sablun / Nisip», poesias, da *Dumenic Andry*. Il cudesch rumantsch-rumen vegn preschenta glindesdi, ils 21 d'october 2019 a las 18.00 en la residenza da l'ambassatur svizzer *Arthur Mattli* a Bucarest. Cumparida è l'ovra tar l'editura universitara a Bucarest.

La preschentaiziun succeda tras *Gisula Tscharner*, Veulden, per rumen. Ella enromescha era musicalmain l'occurrENZA. Preschents èn tant l'autur Dumenic Andry sco la transladadra *Maddeina Popescu-Marin*.

Andry è in poet e scrivent engiadinais. El scriva en vallader ed è spezialmein en-

conuschent sco liricher. Sia ovra litterara è vegnida distinguida pliras giadas. La culminaziun è stada il Premi, retschavi 2018 tras la confederaziun, per l'ovra «Sablun», uss transladata er en rumen.

Popescu-Marin, ch'ha doctorau en filologia, è tant linguista sco scriventa e sa spezialisada sin il rumantsch en Rumenia sco en il sidost da l'Europa. Sia considerabla activitad linguistica e litterara a favur dal rumantsch è vegnida onurada da la regenza grischuna 1999 cun il Premi da renconuschientscha.

Ella saja dal reminent la suletta persuna da l'exteriur ch'haja survegnì quest Premi dal Grischun.

Chasa editura: Istorgia da fantasy

(cp) Las duas auturas *Simona Demarmels* ed *Anna Negrini* han scrit ensemen durant ils onns 2015 e 2016 il roman da fantasy «Sempverd» en surmiran per uffants da la 3- fin 6avla classa. Il cudesch han ellas scrit sco lavur da diplom en il rom da lur scolaziun da magistras per la scola primara. Il cudesch cumpara uss en rumantsch grischun cun illustraziuns da *Jon Bischoff* e cuntegna er il text surmiran.

La vernissascha ha lieu venderdi, ils 25 d'october 2019 a las 18.00 en la Bar Palaver a Savognin. L'occurrENZA è publica. Entrada libra. Cun aperitiv e maisa da cudeschs.



Mudest e tgeuamein eis viagiavs
tras la veta di per di.
La pagaglia meritada
detti Dieus en tschiel leusi.

Cumiau ed engraziament

Nus prendein cumiau da nies frar, quinau, aug e padrin

Theofil Solèr

29-1-1925 – 16-10-2019

El ei spartius en tutta ruasseivladad ella Casa s. Martin a Trun nua ch'el ei vegnius tgiraus cun bia carezia ed attaschadadad.

Adressa da malencurada:
Sep Antoni Decurtins
Via Gravas 29
7166 Trun

En tgeua malencurada:
Alfred Solèr-Rothböck e fam., frar
nevs e niazas
figliols e figliolas

Il survetsch divin e la sepultura dall'urna han liug mardis, ils 22 d'october 2019, allas 14.00 a Trun.

ENGRAZIAMENT

- al persunal dalla Casa s. Martin
- al medi da casa Dr. Martin Tomaschett
- a tuts che han fatg dil bien al Theofil durent sia veta
- a sur Tomasz Piotr Drwal per il survetsch divin e la sepultura